



«Impurtont ei che la veta claustrala mondi **vinavon**»

Avon 100 dis ei Caroline Schweisgut entrada en uffeci sco nova gestiunaria dalla claustra da Glion. Gia avon quater onns ha la dunna oriunda da Basilea midau domicil dil marcau da Turigt a Glion ed ha igl emprems temps luvrau sco interprendidra independenta. Ina dallas sfidas dalla nova gestiunaria ei l'existenza futura dalla claustra da Glion.

MARTIN GABRIEL/FMR

«Gie, jeu s'annunziassel era cun l'experiencescha da 100 dis aunc inagada per quella plazza ch'ei ina incumbensa enorm interessanta e varionta», di *Caroline Schweisgut* che ha studegiu chemia e che ha sin la secunda via professiunala acquistau in master en economia. Sco economista ei la dunna da 54 onns sespecialisada sils secturs dalla direcziun da persunal, dil management da projects, dall'organisaziun e dils beins immobigliars. «Quei ein las cumpetenzas che la claustra drova per la gestiun dils proxims onns», ha la priura generala, sora *Annemarie Müller* detg igl atun 2023 suenter l'elecziun dalla nova gestiunaria e successura da *Ursula Ris* ch'ei ida en pensiun suenter otg onns alla testa operativa dalla claustra. «Jeu haiel surpriu in menaschi intact da mia antecessura», di *Caroline Schweisgut*. Ella hagi artau structuradas saunas, finanzas solidas e 77 collaboraturas e collaboraturs fetg motivai.

Ei drova midadas

La nova gestiunaria ei fermamein perschuada ch'in menaschi sco la claustra dallas **dominicanas** a Glion drova adattaziuns il proxims onns. Exempels concrets seigien las finanzas ni l'alimentaziun da victualias e beins dil mintgadi, di *Caroline Schweisgut*. «Ina caussa che nus vegnin ad optimar il proxim temps ein las sinergias denter las differentas partiziuns el menaschi dalla claustra. Basegns communabels en pliras partiziuns san vegnir liquidai dad ina partiziun per tuts. «Per mantener l'attractivitat dallas plazzas da lavur era per giuvnas collaboraturas e collaboraturs en claustra adattein nus las cundiziuns d'engaschament al pli niev stan. Nus analisein cuntinuadamein

la situaziun finanziala era en veta al fatg, che la cuminonza dallas soras dominicanas vegn pli pintga ils proxims onns. Pli navon luvrein nus vid projects pil futur dalla claustra.»

In menaschi sc'in auter

«La gestiun dalla claustra da Glion variecha da principi buca da quella d'in auter menaschi sil sectur dils survetschs», di *Caroline Schweisgut*. Ei detti sco daper tut midadas e fluctuaziuns sil sectur dil persunal. En quei connex stoppi la claustra considerer ch'il diember da soras dominicanas activas el menaschi tschessi ad in tschessar. «Il menaschi dalla claustra ei auters perquei che nus s'occupein dils basegns dalla cuminonza claustrala e survegnin biars segns d'engraziament dallas soras.» La gestiun fettschi mintga pass el dialog culla priura generala, sora *Annemarie Müller* e cun siu cussegl general.

Ina gronda sfida

Caroline Schweisgut di, che sia pli gronda sfida en uffeci seigi da procurar che la veta claustrala cuntinueschi era cun ina cuminonza da soras pli pintga e per exempel era senza la Scola mercantila Surselva che banduni la claustra en paucs onns. «Impurtont ei ch'ei mondi **vinavon**. Nus vulein porscher era egl avegnir bunas alternativas, per exempel seminaris, retratgas e hotellaria e quei tut el senn e cul spert dallas soras dominicanas. Perquei havein nus in project che senumna «Avegnir dalla claustra da Glion». Enteifer quei project s'occupein nus dils cuntengns che la claustra duei porscher il proxims onns.» Per quei project seigi ins era en contact cun differentes acturs dil maun public e cun organisaziuns interessadas. «Per mei ton-

schan 100 dis en uffeci denton buca per trer conclusiuns detagliadas», di la nova gestiunaria. Ella speri era il proxims meins d'haver ina buna collaboraziun cun las collaboraturas ed il collaboraturs ed oravontut era da saver mantener il stretg contact cun la gestiun spirituala dalla claustra.

Mintga di ei auters

«Ils emprems 100 dis da lavur en claustra ein stai fetg differentes per mei», di

«**Nus analisein cuntinuadamein la situaziun finanziala era en veta al fatg, che la cuminonza dallas soras **dominicanas** vegn pli pintga il proxims onns.**»

Caroline Schweisgut, gestiunaria dalla claustra dallas **dominicanas** da Glion

Caroline Schweisgut. «Atgnamein ei mintga di auters. Ei dat strusch in di ch'entscheiva e cala tuttina. Jeu sun occupada cun fetg biaras sesidas e discutors. Jeu lavurel vi da projects e concepts. E jeu legel documents impurtonts davart il process dil menaschi e tgirel contacts externs.» El mument seigi ella era aunc vidlunder d'emprender d'enconuscher la situaziun ed il basegns da tut las 72 soras e las 77 collaboraturas e collaboraturs dalla clau-



stra. «Ina conclusiun saiel jeu tuttina trer suenter 100 dis», di la nova gestiunaria. «Nus dalla claustra stuein procurar ch'ei vegni raquintau dapli da nosas purschidas e da quei che nus fagein en claustra. Tier nus succeda fetg bia e tenor mei astgass ins far da saver quei aunc pli stedi en nossa regiun.»



L'economa Caroline Schweissgut – cheu sin la terrassa ella vischinonza da siu biro - ei dapi 100 dis en uffeci sco meinafatschenta dalla claustra dominicana a Glion.

FOTO MARTIN GABRIEL



La claustra da Glion dat lavur oz a 77 collaboraturas e collaboratur.

FOTO MAD